

REPUBLIKA E KOSOVËS

KUVENDI I KOMUNËS-VUSHTRRI

PROCESVERBAL
NGA MBLEDHJA E -VIII- (E TETË) E RREGULLT E KUVENDIT TË KOMUNËS
SË VUSHTRRISE, MBAJTUR MË 28 SHTATOR 2017

Mbledhja është mbajtur në sallën e Kuvendit Komunal, duke filluar në orën 10:15.

Në këtë mbledhje ishin të pranishëm anëtarët e Kuvendit të Komunës në Vushtri:
Adnan Klinaku, Agim Bregaj, Agron Përçuku, Ali Januzi, Arta Ismajli, Bahrije Pllana, Ergin Sunguri, Fakete Dushi, Gentiana Rama, Habib Mustafa, Hysni Gërguri, Habibe Gërzhaliu, Isa Hajrizi, Ilmi Azemi, Mehmet Selaci, Mejreme Ismajli, Melihate Basholli, Mentor Ferizi, Mirjeta Salihu, Muharrem Shabani, Myrvete Hetemi, Qerim Selimi, Rrahim Ajeti, Sabri Ferati, Safet Idrizi, Safet Osmani, Selim Rustemi, Selvete Sholla, Shaban Beka, Shkelzen Feka, Shpëtim Zhegrova, Tasim Gubetini, Xhevahire Selmani dhe Zoran Rakiç.

Mungoi: Syzana Syla

Të pranishëm në këtë mbledhje ishin edhe Kryetari i komunës, Nënkryetari i komunës, përfaqësuesi i KFOR-it, përfaqësuesi i OSBE-së dhe përfaqësues të shoqërisë civile.

Mbledhjen e hapi dhe e kryesoi Shpëtim Zhegrova – kryesues i kuvendit, i cili vërtetoi se ka shumicë për punë dhe hapi debatin për rendin e ditës.

Arta Ismajli, anëtare e kuvendit – në fillim të diskutimit të saj paraqiti një rezymë lidhur me aktivitetin e saj politik në kuvendin e komunës gjatë dhjetë viteve të fundit, më poshtë e gjeni të plotë përmbledhjen e diskutimit të saj: Sot në seancën e fundit të këtij mandati dola këtu për herë të parë ta shfrytëzoj foltoren për një informim personal ndaj publikut, mediave dhe të gjithë atyre që kanë shpreh interesim për kandidaturën time për një mandat të katërt. Dhe unë dëshiroj t'iu njoftoj se unë nuk jam konkurrenca në zgjedhjet e 22 tetorit për të vetmen arsye, duke marrë parasysh që unë në këtë kuvend jam që nga viti 2007, tash bëhen 10 vite dhe arsyeja kryesore është reflektimi im, ndoshta ka ardhur koha që disa që kemi qenë për një kohë kaq të gjatë në këto ulëse të lirojmë vendin për të tjerët. Dhe ndoshta nuk e kisha as moshën dhe as kontributin që kam dhënë ta bëja këtë, por marrë parasysh faktin që disa të tjerë që kanë arsye shumë më të mëdha të reflektojnë, ata nuk e bënë këtë gjest, ndoshta kjo për shkak të egoizmit. Në këtë rast unë dëshiroj t'i falënderoj të gjitha partitë politike që më ofruan mundësinë të jem në listat e tyre, qoftë në zgjedhjet nacionale, por edhe në këto zgjedhje, madje që t'ju prijë në listat e tyre. Kjo nuk do të thotë që unë nuk do të jem një njeri i angazhuar, për më tepër nëse situata politike ndryshon ndoshta në mandatin e ardhshëm do të jem prapë konkurrenca gjithmonë nëse e shoh nevojën se po i duhem kuvendit. Gjithashtu, dëshiroj t'ju uroj të gjithë kandidatëve nëpër listat e ndryshme shumë suksese, duke shpresuar dhe besuar që nuk kanë hyrë në ato lista për një pagë e cila është minimale, por për të kontribuar dhe adresuar problemet e qytetarëve në adresat e duhura, ashtu siç kemi bërë në vitin 2007-2008 kur paga jonë ishte tmerrësisht e ulët. Por, ne kishim vullnetin dhe dëshirën që qytetarët tanë të kenë besim tek ne për hallet dhe problemet e tyre dhe kjo ishte e vetmja arsye pse ne qëndronim në këtë kuvend. Për vitet sa

isha në këtë kuvend, gjithmonë isha në opozitë dhe normalisht që opozita e ka një lloj detyre të kritikës më të theksuar se pozita dhe në këtë rast dëshiroj ta falënderoj kryetarin e komunës për mirëkuptimin e tij ndaj kritikave tona me vend dhe rrallëherë të paqëlluara. Mirëpo të gjitha kanë qenë kritika dashamirëse në mënyrë që përmes kritikave tona, vërejtjeve apo edhe sugjerimeve, jemi munduar që punët dhe aktivitetet të kryhen në mënyrën më të mirë të mundshme, ngase janë kryer për të mirën e qytetarëve tanë dhe vetë neve që jemi pjesë e këtij komuniteti dhe këtij lokaliteti. Kolegë të mi, iu falënderoj për bashkëpunimin e juaj dhe të disave në veçanti që shpeshherë shkelet mbi dinjitetin e juaj, mbi qëndrimet politike vetëm për të mirën e qytetarëve. Meqenëse në këtë kuvend po behën afër 4 vite që aktivitetin tim po e zhvilloj si e pavarur politikisht dhe meqë jemi afër zgjedhjeve, normal që karriera ime nuk më lejon që të qëndroj 100% indiferente ndaj kësaj kauze dhe si e pavarur më jepet e drejta e plotë që në mënyrën më demokratike ta mbështes qoftë një kandidat për kryetar komune apo një listë për anëtarë të kuvendit komunal. Dhe unë këtë herë do ta mbështes një njeri të cilin e kishim edhe koleg në këtë kuvend dhe udhëheqës të këtij kuvendi, kjo për të vetmen arsye sepse ne i njohim mirë reagimet dhe veprimet e tij në raste të caktuara, duke anashkuar edhe qëndrimet jo të drejta të partisë së tij për të mirë të qytetarëve dhe shpeshherë duke respektuar më shumë propozimet e opozitës sepse dinte ku është drejtësia. Kështu që i bëj thirrje të gjithë qytetarëve që këtë herë të mos bazohen shumë në partitë politike, por thjeshtë në individ, ashtu siç po veprojnë unë dhe shumë miq të mi, sepse në një situatë tjetër dhe me një kandidaturë tjetër ndoshta edhe qëndrimi im do të ishte ndryshe. Mbështetja e këtij kandidati nuk do të thotë mbështetje edhe për listën e asaj partie për kuvendin komunal, mendoj se kjo është demokracia dhe e drejta e plotë e jona që nuk jemi të përcaktuar nëpër parti politike. Edhe njëherë suksese të gjithë kandidatëve për kryetar të komunës sonë dhe të gjithë kandidatëve për kuvendin komunal. Në fund tha se shpresoj që sadopak ka dhënë për këtë kuvend për këta qytetarë, të cilët e përkrahën dhe më mbështetën për 10 vite. Do të jetë mirënjohëse gjithmonë.

Hysni Gërguri, anëtar i kuvendit – duke iu referuar diskutimit të parafolësës së tij, vlerësoi se zonja Ismajli e keqpërdori foltoren e kuvendit, duke mbajtur fjalim politik për mbështetje të një kandidati që garon për potin e kryetarit të komunës. Tutje shtoi se kjo zonjë do të mund të përkrahte secilin kandidat përmes ndonjë konference për media, por assesi nuk ka të drejtë të keqpërdor foltoren e kuvendit për qëllime të fushatës elektorale.

Habib Mustafa, anëtar i kuvendit – kërkoi që në pikën në të ndryshme të futet një pikë shtesë lidhur me emërtimin e një rruge në fshatin Beçuk me emrin e veteranit të UÇK-së Naser Miftari.

Ilmi Azemi, anëtar i kuvendit – propozoi që pika që ka të bëjë me ndryshimin e rregullores së punës së kuvendit të hiqet nga rendi i ditës.

Rrahim Ajeti, anëtar i kuvendit – pyeti se a është duke u zbatuar rekomandimi i kuvendit për mosaplikimin e kushtëzimit të ofrimit të shërbimeve komunale me vërtetimin e pagesës së taksave për mbeturinat, pasi që qytetarët po ankohen se ky kushtëzim akoma është në fuqi.

Mehmet Selaci, anëtar i kuvendit – pyeti se një kërkesë e parashtruar nga shoqata "Drita jonë", përse nuk është futur në rend të ditës.

Shkelzen Feka, anëtar i kuvendit – tha se për të mbetet shqetësues fakti se për katër vitet e këtij mandati qeverisës, materialet për pikat e rendit të ditës nuk u sollën sipas afatit ligjor të përcaktuar me ligj dhe me rregulloren e punës së kuvendit. Në fund tha se shpreson se në mandatin e ardhshëm kjo qasje të ndryshojë.

Në përfundim të diskutimeve rreth rendit të ditës, Kuvendi me 32 vota "për" 2 vota "abstenim" aprovoi këtë:

RENDITE

1. Shqyrtimi dhe aprovimi i procesverbalit nga mbledhja e rregullt e kuvendit e datës 27.07.2017;
2. Shqyrtimi i Draft- buxhetit dhe planeve investuese për vitin 2018;
3. Shqyrtimi i Draft-rregullores të tatimit në pronë për vitin 2018 (shqyrtimi i dytë);
4. Shqyrtimi i Raportit për situatën ekonomiko-financiare dhe zbatimin e planeve investuese për gjashtëmujorin e parë të vitit 2017;
5. Shqyrtimi i Informatës për përfundimin e vitit shkollor 2016/2017 dhe përgatitjet për fillimin e vitit shkollor 2017/2018;
6. Shqyrtimi i Propozim-vendimit për caktimin e rrugëve për ndërtim me kubëza;
7. Shqyrtimi i Propozim-vendimit për lejimin e ndërrimit të destinimit të tokës bujqësore në tokë ndërtimore;
8. Shqyrtimi i Propozim-vendimit për dhënien në shfrytëzim të përkohshëm të katit të parë të Muzeut Historik-Etnografik për shkollën e Muzikës "Tefta Tashko";
9. Shqyrtimi i Propozim-vendimit për kompensimin e kryetarëve të këshillave të fshatrave, vendbanimeve dhe lagjeve urbane të Komunës së Vushtrrisë;
10. Shqyrtimi i Informatës për përfundimin e korrje-shirjeve për vitin 2017;
11. Shqyrtimi i Informatës lidhur me punën e KKSBB-së për gjashtëmujorin e parë të vitit 2017;
12. Shqyrtimi i Propozim-vendimit për ndryshimin e projektit të shkollës në fshatin Beçuk;
13. Shqyrtimi i Propozim-vendimit për ridestinimin e mjeteve nga fondi për transfere dhe subvencione;
14. Shqyrtimi i kërkesës për ofrimin e ndihmës financiare për shërim për Olta Tërstenën;
15. Shqyrtimi i kërkesës për ofrimin e ndihmës financiare për Muharrem Shabanin;
16. **Të ndryshme.**
 - a). Shqyrtimi i kërkesës për emërtimin e rrugës me emrin e veteranit të UÇK-së Naser Miftari;
 - b). Shqyrtimi i Propozim-vendimit për caktimin zonës me interes publik të pronës së paluajtshme të komunës;
 - c). Shqyrtimi i Draft-rregullores për mënyrën e organizimit dhe funksionimin e bibliotekës "Naim Frashëri", si dhe nëndegëve të saj në territorin e Vushtrrisë;
 - ç). Shqyrtimi i Propozim-vendimit për rithemelimin e Arkivit komunal të Vushtrrisë;
 - d). Shqyrtimi i Propozim-vendimit për ridestinimin e mjeteve financiare të komunës;
 - dh). Shqyrtimi i Draft-rregullores për organizimin dhe funksionimin e ansamblit komunal të këngëve dhe valleve "Hasan Prishtina" në Vushtri;
 - e). Shqyrtimi i Draft-rregullores për organizimin dhe funksionimin e teatrit të qytetit të Vushtrrisë;
 - ë). Shqyrtimi i Draft-rregullores për mënyrën e organizimit dhe funksionimit të Muzeut Historik-Etnografik në Komunën e Vushtrrisë;
 - đ). Shqyrtimi i Draft-rregullores për organizimin dhe funksionimin e Arkivit komunal të Vushtrrisë.

1. Shqyrtimi dhe aprovimi i procesverbalit nga mbledhja e rregullt e kuvendit e datës 27.07.2017

Pas shqyrtimit të kësaj pike të rendit të ditës, Kuvendi pas votimit në mënyrë "unanime" aprovoi procesverbalin nga mbledhja e rregullt e kuvendit e datës 27.07.2017.

2. Shqyrtimi i draft- buxhetit dhe planeve investuese për vitin 2018

Isuf Jashari, drejtor i DBF-së – paraqiti sqarime hyrëse sa i përket draft-buxhetit të komunës për vitin 2018.

Shpëtim Zhegrova, kryesues i kuvendit – propozoi që tek rrugët që parashihet të ndërtohen me kubëza, këto projekte të mos ndahen në vite, por të jenë projekt trevjeçar, si dhe në kuadër të buxhetit komunal të futet edhe një rrugë në fshatin Karaçë, pasi kjo është rekomanduar edhe në Komitetin për Politikë dhe Financa. Gjithashtu propozoi që në kuadër të rrugëve me kubëza të futet edhe rruga “Kalabria” në fshatin Shtitaricë, si dhe rruga “Hysen dhe Xhavit Hyseni, kurse në kolonën 26 të përmirësohet një gabim teknik në vend të emërimit Zeqiri të bëhet Xhavit Bahtiri. Tutje shtoi se buxheti i komunës për vitin 2018 është planifikuar në mënyrën më të mirë të mundshme nga ana e qeverisë komunale, duke u marrë për bazë kërkesat e qytetarëve. Pastaj ceku se në kuadër të këtij buxheti është inkorporuar një projekt, i cili konsiderohet madhor për interesat e qytetarëve. Fjala është për rrugën Vushtrri-Nadakoc-Pestovë, rrugë e cila do ta shkarkojë rrugën magjistrale në segmentin e cekur. Mandej projekt po kaq me vlerë është ndërtimi i objektit për familjet e dëshmorëve dhe invalidëve të UÇK-së, por edhe për skamnorët, projekt ky i cili do të përfundojë brenda afatit trevjeçar. Rregullimi i lumit “Tërrstena” gjithashtu është projekt i inkorporuar në buxhetin komunal për vitin 2018, rregullimi i shtratit të lumit “Podrança”, rregullimi i shtratit të lumit “Silnica”, ndërtimi i impiantit për trajtimin e ujërave të zeza, mandej ndërtimi i shkollave në fshatin Dumnicë e Mesme, Beçuk dhe Stanoc, nga mallra dhe shërbime është marrë vendimi për mbulimin e shpenzimeve të varrimit për qytetarët e Vushtrrisë, shërbimi i transportit të nxënësve është planifikuar në buxhet dhe kjo do të fillojë të zbatohet nga 1 janari i vitit 2018 dhe në fund në këtë projektbuxhet janë planifikuar mjete për zgjerimin e rrjetit të ujitjes në fshatin Pantinë dhe Samadrexhë.

Hysni Gërguri, anëtar i kuvendit – tha se edhe përkundër faktit se në këtë draft-buxhet janë futur mjaft projekte të rëndësishme së veçantë, propozimet e dhëna nga grupi kuvendar i LDK-së, nuk janë marrë për bazë që të futen në këtë projekt-buxhet. Pastaj vlerësoi se ky projekt-buxhet nuk është zhvillimor, për faktin se nuk i është dhënë prioritet bujqësisë edhe pse ka rritje të subvencioneve në këtë degë të ekonomisë. Në lidhje me draft-buxhetin komunal për vitin 2018, në emër të grupit kuvendar të LDK-së paraqiti këto projekte: subvencionimi i ujitjes për bujqit, subvencionimi i analizave të tokës bujqësore dhe lloji i rendimenteve, ndarja e buxhetit për teren sportiv multifunksional në qytet, mandej rritja e të hyrave vetanake me zgjerim të bazës tatimore, por jo me rritje të tatimit.

Shpëtim Zhegrova, kryesues i kuvendit – tha se janë planifikuar mjete në buxhetin e vitit 2018 për terrene sportive, multifunksionale tek stadiumi “Musa Abazi”, mjetet janë paraparë edhe për ndërtimin e një ure në fshatin Dobërllukë, kurse analizat e tokës janë në kompetencë të Ministrisë së Bujqësisë.

Safet Idrizi, anëtar i kuvendit – pyeti se sa është shuma e mjeteve të planifikuara për rinovimin e objekteve shëndetësore. Në këtë kontekst propozoi që shuma prej 15.000 € të hiqet dhe të dedikohet për blerjen e aparaturës shëndetësore (pajisje shëndetësore), për faktin se ka nevojë të pajisen me një rëntgen për fotografimin e dhëmbëve.

Abit Abiti ZKF – paraqiti sqarime profesionale lidhur me draft-buxhetin e komunës për vitin 2018, duke dhënë përgjigje në çështjet e ngritura nga anëtarët e kuvendit.

Mehmet Selaci, anëtar i kuvendit – tha se sa i përket shërbimeve të transportit të nxënësve, ato të mbulimit të shpenzimeve të varrimit, si dhe ndërtimi i çerdhes, këto projekte janë propozuar për katër vite me radhë nga grupi kuvendar i LVV-së, dhe tani i vjen shumë mirë që në fund të mandatit janë planifikuar mjete financiare për realizimin e këtyre projekteve. Tutje vlerësoi se buxheti i planifikuar për vitin 2018, nuk ndryshon nga ato të viteve të kaluara, sepse është “buxhet i asfaltit dhe i betonit”, buxhet klientelist me idenë që “unë ta shtroj rrugën, ndërsa ti më jep votën” dhe unë të jap tenderin, kurse ju më jepni 10% të mjeteve të atij tenderi.

Arta Ismajli, anëtare e kuvendit – tha se është mirë që po ndërtohet rruga në fshatin Gumnishtë, me qëllim që të parandalohet migrimi i banorëve nga ky fshat, dhe në këtë kontekst propozoi që mjetet e planifikuara për këtë projekt në vitin 2019 të planifikohen në vitin 2018 me qëllim që ky projekt të përfundojë sa më parë që të jetë e mundur.

Habibe Gërxfaliu, anëtare e kuvendit – e përkrahi propozimin e parafolësës së saj dhe kërkoi që kompania e cila është duke shfrytëzuar zhavorrin në fshatin Gumnishtë, të ndërmarrë veprime për rregullimin e asaj rruge.

Shkelzen Feka, anëtar i kuvendit – tha se vërejtjet të cilat i ka dhënë në KPF nuk janë marrë për bazë, dhe përsëriti se duhet të bëhet qartësimi i projekteve si për lokalitet ashtu edhe për afatin e përfundimit të projektit dhe jo që ato të paraqiten në mënyrë të përgjithësuar.

Në fund të diskutimit lidhur me këtë pikë të rendit të ditës, Kuvendi pas votimit me 23 vota “për”, 8 vota “kundër” vendosi me sa vijon:

1. Me këtë vendim aprovohet buxheti i Komunës së Vushtrrisë, KAB-i dhe lista e projekteve kapitale për vitet 2018-2020, konform Qarkoreve Buxhetore 01/2018 dhe 02/2018 të lëshuara nga MF-ja.

2. Shuma e përgjithshme e buxhetit të Komunës së Vushtrrisë për vitin 2018 është 17,203,662.00 €, prej të cilave për:

• Paga dhe mëditje.....	9,709,493.00 €.
• Mallra dhe shërbime.....	2,551,008.00 €.
• Shpenzime komunale.....	241,042.00 €.
• Subvencione.....	182,914.00 €.
• Shpenzime kapitale.....	4,519,205.00 €.
Gjithsej:.....	17,203,662.00 €.

3. Të hyrat vetanake të planifikuara.....2,275,368.00 €.

4. Mjetet financiare të cekura në pikën 2 dhe 3 të këtij vendimi janë në pajtim me Qarkoren Buxhetore 2018/02 të MF-së, në bazë të kufijve buxhetor.

5. Për zbatimin e këtij vendimi do të obligohet: Drejtoria për Buxhet dhe Financa, Kryetari i komunës dhe drejtoritë tjera kompetente.

6. Tabela 4.1- Plani i ndarjeve buxhetore të shpenzimeve totale të komunës për vitin 2018; tabela 4.2 – Investimet kapitale në Komunën e Vushtrrisë për vitin 2018-2020; dhe tabela 4.3, janë pjesë e këtij vendimi, të bashkëngjitura në shtojcë.

7. Ky vendim hyn në fuqi pas aprovimit dhe nënshkrimit nga kryesuesi i kuvendit dhe i njëjti i dorëzohet Ministrisë së Financave për zbatim.

3. Shqyrtimi i parë i Draft-Rregullores për Tatimin në Pronën e Paluajtshme për vitin 2018

Shkelzen Feka, anëtar i kuvendit – propozoi që zona e parë tatimore të ndahet në dy nënzona, kjo për arsye se vlera e pronës nuk është e njëjtë, mandej të bëhet ndarja e pronës në etazhe me qëllim që të kemi vlerësim dhe aplikim real të tarifave tatimore.

Lidhur me këtë pikë të rendit të ditës, Kuvendi pas votimit me 21 vota “për”, 6 vota “kundër”, të tjerat “abstenim” vendosi me sa vijon:

1. Me këtë vendim aprovohet Rregullorja mbi Tatimin në Pronën e Paluajtshme të Komunës së Vushtrrisë për vitin 2018.

2. Për zbatimin e këtij vendimi obligohet Drejtoria për Buxhet dhe Financa.

3. Ky vendim hyn në fuqi pas aprovimit dhe nënshkrimit nga kryesuesi i kuvendit.

Shpëtim Zhegrova, kryesues i kuvendit – paraqiti sqarime lidhur me disa çështje që lidhen me diskutimin e anëtares së kuvendit Arta Ismajli dhe u përgjigj në çështjet e ngritura nga grupi kuvendar i LDK-së.

Hysni Gërguri, anëtar i kuvendit – përsëriti se anëtarja e kuvendit znj. Ismajli e keqpërdori foltoren e kuvendit duke bërë fushatë politike, duke mbështet një kandidat për kryetar komune, dhe aq më keq kjo u lejua nga kryesuesi i kuvendit dhe u mbështet me duartrokitje.

Arta Ismajli, anëtare e kuvendit – tha se e shfrytëzoi foltoren e kuvendit për t'i informuar qytetarët lidhur me moskandidimin e saj, dhe ceku se nëse diskutimi i saj paraqet shkelje ligjore, atëherë ajo është e gatshme të përgjigjet dhe t'i bartë pasojat.

Hysni Gërguri, anëtar i kuvendit - duke iu referuar diskutimit të znj. Ismajli ceku se nëse ajo ka diçka personale, atëherë ajo mund ta thotë lirisht dhe përsëriti se ajo e shpërdoroi foltoren e kuvendit për fushatë parazgjedhore.

Qerim Selimi, anëtar i kuvendit – tha se duhet të lihen mënjandë debatet e thata dhe se do të koncentrohemi në temat që janë objekt i rendit të ditës, të cilat janë me interes për qytetarët e komunës tonë.

4. Shqyrtimi i Raportit për situatën ekonomiko-financiare dhe zbatimin e planeve investuese për gjashtëmujorin e parë të vitit 2017

5. Shqyrtimi i Informatës për përfundimin e vitit shkollor 2016/2017 dhe përgatitjet për fillimin e vitit shkollor 2017/2018

Mehmet Selaci, anëtar i kuvendit – duke iu referuar informatës në fjalë, ceku se një konkurs i përgatitur në bashkëpunim me OJQ-në "Smart" për angazhimin në punë të shumë mësimdhënësve. Lidhur me këtë çështje ai njoftoi se ka pasur mjaft shumë ankesa nga qytetarët për padrejtësi që janë bërë në punësimin e këtyre mësimdhënësve, andaj ai kërkoi sqarime lidhur me këtë konkurs, duke u njoftuar kuvendi se kush është kjo organizatë, çfarë kompetencash ka, dhe se përse përzgjedhjen e ka bërë kjo kompani e jo komuna. Në fund ai kërkoi një informatë të detajuar lidhur me këtë çështje dhe shtoi se komuna duhet të ndërmarrë veprime për mënjanimin e shumë shkeljeve që kanë ndodhur në këtë konkurs.

Bajram Mulaku, Kryetar i komunës – pasi falënderoi anëtarët e kuvendit për bashkëpunimin që kanë pasur gjatë këtyre katër viteve të mandatit, vlerësoi se gjatë gjithë këtyre viteve sa ka qenë në pozitën e të parit të komunës, ka bërë përpjekje që të jetë kryetar i të gjithë qytetarëve të komunës dhe të ketë një bashkëpunim të shëndoshë me të gjithë e sidomos me anëtarët e kuvendit të komunës. Pastaj ai ceku se çdo propozim i bërë nga anëtarët e kuvendit për të ka qenë i vlefshëm dhe brenda mundësive të tij është munduar që ta zbatojë në praktikë. Lidhur me punën e tij ai ceku se ndihet mirë që shumë projekte janë jetësuar gjatë mandateve të tij dhe krejt këto në interes të qytetarëve të Komunës së Vushtrrisë. Mandej ai shtoi se për punën e tij e ka ndërgjegjen e pastër se ka punuar vetëm për interesat e qytetarëve, andaj në këtë kontekst iu uroi suksese të gjithë kandidatëve qoftë për kryetar të komunës apo për anëtarë të kuvendit. Në javëve një organizatë e quajtur "Smart" ka ardhur në zyrat e komunës dhe ka shprehur gatishmërinë që të bashkëpunojë me komunë, për angazhimin e disa punëtorëve arsimor në

nivelin parashkollor, ku nga komuna është kërkuar që të sigurohet hapësira shkollore, kurse financimi i këtyre mësimdhënësve do të bëhet nga kjo organizatë dhe për këtë është nënshkruar marrëveshja.

Agim Miftari, drejtor i Drejtorisë së Arsimit – paraqiti sqarime lidhur me informatën në fjalë duke u përgjigjur në pyetjet e anëtarëve të kuvendit.

Mehmet Selaci, anëtar i kuvendit – tha se gjatë pranimit të këtyre punëtorëve ka pasur shkelje të procedurave dhe kushteve të konkursit, ku në një rast është punësuar gruaja e një zyrtari të lartë të komunës, por shkelje ka pasur edhe për sa i përket kualifikimit të këtyre punëtorëve.

Bajram Mulaku, Kryetar i komunës – tha se lidhur me angazhimin e këtyre punëtorëve do të kërkojë raport dhe në mënyrë periodike këta mësimdhënës do të kontrollohen, ku ceku se shpreson se ky projekt do të realizohet me sukses.

Qerim Selimi, anëtar i kuvendit – tha se ky projekt është madhor, kur dihet se po punësohen një numër i konsiderueshëm i psikologëve dhe pedagogëve dhe kjo sigurisht se ka efekt mjaft pozitiv për komunën tonë. Tutje shtoi se personat që janë angazhuar në punë në saje të këtij projekti kanë kryer trajnime në SHMU-2 dhe se këta kandidatë janë të përgatitur profesionalisht. Ajo çka është e rëndësishme, është që ky projekt të mbikëqyret dhe të zbatohet me përpikëri.

Mentor Ferizi, anëtar i kuvendit – tha se realizimi i këtij projekti meriton të përgëzohet, për shkak se ky projekt po mundëson punësimin e disa psikologëve dhe pedagogëve dhe kjo është gjithë me interes për komunën tonë. Pastaj ai vlerësoi se është aftësi e menaxherit të projektit që ka mund të thith mjetet për këtë projekt dhe ka bërë diçka të mirë për komunën tonë.

6. Shqyrtimi i Propozim-vendimit për caktimin e rrugëve për ndërtim me kubëza

Shpëtim Zhegrova, kryesues i kuvendit – tha se ndërtimi i këtyre rrugëve po bëhet nga mjetet që kanë tepruar nga projektet tjera kapitale, dhe ceku se është mirë që të bëhet ridestini i këtyre mjeteve për faktin që këto mjete të mos shkojnë në suficit, kurse për këto rrugë është bërë edhe paramasa. Pastaj propozoi që rruga në fshatin Brusnik afër shamisë të shtohet edhe për 70 metra, ashtu që të bëhet kompletimi dhe qasja më mirë në këtë rrugë.

Bajram Mulaku, Kryetar i komunës – njoftoi se për këto rrugë është hartuar paramasa dhe shtoi se nëse nga këto projekte teprojnë mjete financiare, atëherë le të jepet propozimi që rruga në fshatin Karaçë në gjatësi prej 300 m të ndërtohet nga këto mjete, të cilat do të tepronin me qëllim që mos të ketë nevojë të merret edhe një vendim tjetër i kuvendit.

Në fund të diskutimit lidhur me këtë pikë të rendit të ditës, Kuvendi pas votimit me 26 vota “për”, të tjerat “abstenim” vendosi me sa vijon:

1. Me këtë vendim caktohen rrugët për ndërtim me kubëza nga mjetet e mbetura prej projektit të njëjtë (rrugëve me kubëza), kodi i projektit 41406.

2. Ndërtimi i rrugëve me kubëza bëhet në lokalitete si në vijim:

2.1 Rruga „Jeton Tërrstena” L=131 m, b=4 m;

2.2 Rruga „Rafet e Burim Behrami” L=110 m, b=4 m;

2.3 Segmenti i rr. „Nezir Imeri” L=63 m, b=3.5 m;

2.4 Rruga „Veli dhe Kurtesh Haxhiu” L=280 m, b=3.5 m;

2.5 “Lagjja e Mërrnicëve” L=200 m, b=3 m;

2.6 Rruga „Ismail Parduzi” L=200 m, b=3 m;

2.7 Rruga „Dituria” L=277 m, b=3.5 m;

2.8 Rruga në fshatin Brusnik te xhamia L=215 m, b=3.5 m;

2.9 Rruga në Brusnik rr. „Bec Muzaqi” segmenti I dhe II L=230 m, b=3.5 m;

2.10 Segmenti i rr. „Lumni Surdulli” L=55 m, b=3.5 m;

3. Për zbatimin e këtij vendimi obligohet: Drejtoria për Buxhet dhe Financa dhe Drejtoria për Shërbime Publike.

7.Shqyrtimi i Propozim-vendimit për lejimin e ndërrimit të destinimit të tokës bujqësore në tokë ndërtimore

Lidhur me këtë pikë të rendit të ditës, Kuvendi pas votimit në mënyrë “unanime” vendosi me sa vijon:

1. Lejohet ndërrimi i destinimit nga toka bujqësore në tokë ndërtimore në parcelën kadastrale: nr.P-70202030-00575-0, me kulturë arë e klasës së 5 (pestë), në sipërfaqe prej 1750m² të marrë nga sipërfaqja totale 12778m², Zona Kadastrale Druar, pronë e Haxhere Murtezit me vendbanim në fshatin Druar, Komuna Vushtrri.

2. Qëllimi i lejimit për ndërrimin e destinimit të tokës bujqësore në tokë ndërtimore në parcelën kadastrale, të cekur si në pikën 1 të këtij vendimi, është ndërtimi i objektit fermë për kultivimin e zogjve.

3. Lejen ndërtimore dhe kushtet për rregullimin e hapësirës për ndërtimin e objektit nga pika 2 e këtij vendimi, do ta lëshojë dhe përcaktojë konform dispozitave ligjore Drejtoria për Urbanizëm dhe Mbrojtje të Mjedisit pas pagesës së tarifës për ndërrim të destinimit të tokës bujqësore.

4. Obligohet pronari i parcelës nga pika 1 e këtij vendimi që të bëjë pagesën e tarifës për ndërrim të destinimit të tokës bujqësore sipas nenit 14.2 nën “b” të Udhëzimit Administrativ për ndërrimin e destinimit të tokës bujqësore Nr.41/2006, përmes Drejtorisë për Ekonomi, Bujqësi, Pylltari dhe Zhvillim Rural.

5. Për zbatimin e këtij vendimi obligohen: Drejtoria për Ekonomi, Bujqësi, Pylltari dhe Zhvillim Rural, Drejtoria për Gjeodezi, Kadastër dhe Pronë dhe Drejtoria për Urbanizëm dhe Mbrojtje të Mjedisit.

8.Shqyrtimi i Propozim-vendimit për dhënien në shfrytëzim të përkohshëm të katit të parë të Muzeut Historik-Etnografik për shkollën e Muzikës “Tefia Tashko”

Shukrane Begu, udhëheqëse e Muzeut - sqaroi se bëhet fjalë për dhënien në shfrytëzim të pjesës lindore të katit të parë të Muzeut Historik-Etnografik, në hapësirë prej pesë kthinave dhe një nyje sanitare e cila do të shfrytëzohet edhe nga personeli i muzeut.

Lidhur me këtë pikë të rendit të ditës, Kuvendi pas votimit në mënyrë “unanime” vendosi me sa vijon:

1. Me këtë vendim Shkollës së Muzikës “Tefta Tashko” paralele e ndarë në Vushtrri, i jepet në shfrytëzim të përkohshëm, pjesa lindore e katit të parë e Muzeut Historik-Etnografik (Shtëpia e Mahmut agë Gjinollit) prej gjashtë (6) kthinave, ku njëra prej tyre do të shfrytëzohet për nyje sanitare nga stafi i muzeut dhe i shkollës së muzikës.

2. Qëllimi i nxjerrjes së këtij vendimi, është dhënia afatshkurtër e pronës së komunës në shfrytëzim prej datës 01.01.2018 deri më 31.12.2019.

3. Për zbatimin e këtij vendimi obligohen: Drejtoria e Arsimit dhe Drejtoria e Kulturës, Rinisë dhe Sportit.

9. Shqyrtimi i Propozim-vendimit për kompensimin e kryetarëve të këshillave të fshatrave, vendbanimeve dhe lagjeve urbane të Komunës së Vushtrrisë
Shpëtim Zhegrova, kryesues i kuvendit – propozoi që të mbahen gjashtë takime (mbledhje) të këshillave të fshatrave për një vit kalendarik dhe kompensimi i kryetarëve të jetë 50 € për muaj.

Bajram Mulaku, Kryetar i komunës – tha se logjika e ndarjes së mëditjes me nga 25 € për mbledhjen kur mbahet dhe mëditja tjetër me nga 25 € në momentin kur kryetarët e këshillave raportojnë para organeve komunale ka për qëllim që këta të jenë më aktiv dhe më përgjegjës për punën dhe aktivitetin e tyre.

Lidhur me këtë pikë të rendit të ditës, Kuvendi pas votimit në mënyrë “unanime” vendosi me sa vijon:

1. Me këtë vendim aprovohet kompensimi në shumën prej njëzet e pesë (25.00) euro për çdo mbledhje të mbajtur nga kryetarët e këshillave të fshatrave, vendbanimeve dhe lagjeve urbane të Komunës së Vushtrrisë.

2. Mëditjet si në pikën 1 të këtij vendimi do të kompensohen, gjashtë (6) mëditje për mbledhjet, si dhe 6 mëditje në momentin ku kryetarët e fshatrave raportojnë para organeve komunale.

3. Numri i mbledhjeve me kompensim është gjashtë (6), ndërsa pa kompensim mund të mbahen edhe më shumë.

4. Për zbatimin e këtij vendimi obligohet Drejtoria për Administratë dhe Drejtoria për Buxhet dhe Financa.

10. Shqyrtimi i Informatës për përfundimin e korrje-shirjeve për vitin 2017

11. Shqyrtimi i Informatës lidhur me punën e KKSB-së për gjashtëmujorin e parë të vitit 2017

12. Shqyrtimi i Propozim-vendimit për ndryshimin e projektit të shkollës në fshatin Beçuk

Bajram Mulaku, Kryetar i komunës – sqaroi se shkolla në fshatin Beçuk ishte planifikuar që të rinovohet, por pasi kishte filluar meremetimi i saj është parë që ai objekt është i paqëndrueshëm dhe nga ky shkak është vendosur që ky projekt të ndryshohet, andaj për këtë nevojitet vendimi i kuvendit që të ndërtohet nga themelet shkolla në fshatin Beçuk.

Lidhur me këtë pikë të rendit të ditës, Kuvendi pas votimit në mënyrë “unanime” vendosi me sa vijon:

13. Shqyrtimi i Propozim-vendimit për ridestinimin e mjeteve nga fondi për transfere dhe subvencione

Lidhur me këtë pikë të rendit të ditës, Kuvendi pas votimit në mënyrë "unanime" vendosi me sa vijon:

1. Me këtë vendim shuma prej një mijë e shtatëqind euro (1,700.00) € ridestinohet nga kategoria subvencione (pozicioni KVRL), në realizimin e projektit "Ngjyrosja e hapësirave publike, të cilat dedikohen për organizatën joqeveritare e cila do të dalë fituese në konkursin për "Ngjyrosjen e hapësirave publike".
2. Mjetet e cekura në pikën 1 të këtij vendimi, ndahen në bazë të kritereve dhe kushteve të përcaktuara me Rregulloren 01Nr.37-2/11 për Përcaktimin e Kritereve të Ndarjes së Mjeteve Financiare nga Fondi për Transfere dhe Subvencione për Ndhimë Momentale Entiteteve Publike dhe Jopublike.
3. Për zbatimin e këtij vendimi obligohen: Drejtoria për Kulturë, Rini dhe Sport dhe Drejtoria për Buxhet dhe Financa.

14. Shqyrtimi i kërkesës për ofrimin e ndihmës financiare për shërim për Olta Tërrstenën

Ilmi Azemi, anëtar i kuvendit – paraqiti sqarime lidhur me këtë kërkesë, duke arsyetuar atë ku ceku se fjala është për ofrimin e ndihmës financiare për shërim, gjegjësisht (për një operacion në zemër), për Olta Tërrstenën, në ç'rast shpenzimet e këtij operacioni i mbulon një organizatë joqeveritare ndërkombëtare, por komuna duhet t'i sigurojë shpenzimet e udhëtimit për nënën e fëmijës në vlerë prej 3000 €, andaj nga kjo kërkoj që kjo kërkesë të aprovohet, ku mjetet financiare do të mund të siguroheshin nga kategoria e mallrave dhe shërbimeve.

Bajram Mulaku, Kryetar i komunës – tha se këto kërkesa janë mjaft të ndjeshme, si për qeverinë ashtu edhe për kuvendin e komunës. Pastaj sqaroi se subvencionet për këtë vit janë shpenzuar shumë më herët sesa përfundimi i vitit kalendarik, dhe për këtë ka kërkuar nga Drejtoria e Financave që të ofrojë një listë për gjendjen e subvencioneve për vitin 2017. Mandej ai njoftoi kuvendin se përpos në zyrën e kryetarit që ka mbetur një shumë simbolike e subvencioneve, të cilat janë të dedikuara për raste emergjente, subvencione në tjerat dikastere për vitin 2017 nuk kanë mbetur. Andaj sa i përket subvencioneve ceku se mjete nuk ka, kurse nga mallrat dhe shërbime mund të merren paratë, por për këtë duhet të shikohet ana ligjore, se a kemi apo nuk kemi të drejtë që të bëhet pagesa.

Lidhur me këtë pikë të rendit të ditës, Kuvendi pas votimit në mënyrë "unanime" vendosi me sa vijon:

1. Me këtë vendim lejohen mjete financiare në vlerë prej tre mijë euro (3.000 €) nga buxheti i komunës – kategoria e mallrave dhe shërbimeve ose nga kategoria e subvencioneve, për Olta/Agron/Tërrstenën me banim në Vushtrri, Komuna e Vushtrrisë.
2. Shuma e cekur në pikën 1 të këtij vendimi, ndahet në emër të Agron Tërrstenës, (babai i Olta Tërrstenës) dhe do të shërbejë për shërimin e sëmundjes së saj.
3. Për zbatimin e këtij vendimi obligohen: Drejtoria për Shëndetësi dhe Përkujdesje Sociale, Drejtoria për Buxhet dhe Financa dhe Zyra e Kryetarit.

15. Shqyrtimi i kërkesës për ofrimin e ndihmës financiare për Muharrem Shabanin

Lidhur me këtë pikë të rendit të ditës, Kuvendi pas votimit në mënyrë "unanime" vendosi me sa vijon:

1. Me këtë vendim lejohen mjete financiare në vlerë prej një mijë e pesëqind euro (1.500 €) nga buxheti i komunës – kategoria e mallrave dhe shërbimeve ose nga kategoria e subvencioneve, për Muharrem Shabanin me banim në Vushtrri, Komuna e Vushtrrisë.
2. Shuma e cekur në pikën 1 të këtij vendimi, ndahet me qëllim të mbulimit të shpenzimeve të operimit të tij.
3. Për zbatimin e këtij vendimi obligohen: Drejtoria për Shëndetësi dhe Përkujdesje Sociale, Drejtoria për Buxhet dhe Financa dhe Zyra e Kryetarit.

16. Të ndryshme.

- a). Shqyrtimi i kërkesës për emërtimin e rrugës me emrin e veteranit të UÇK-së Naser Miftari

Lidhur me këtë pikë të rendit të ditës, Kuvendi pas votimit në mënyrë “unanime” vendosi me sa vijon:

1. Me këtë vendim aprohet emërtimi i rrugës së re me emrin e veteranit të UÇK-së Naser Miftari në fshatin Beçuk, Komuna e Vushtrrisë.
2. Për zbatimin e këtij vendimi obligohen: Drejtoria për Urbanizëm dhe Mbrojtje të Mjedisit, Drejtoria për Shërbime Publike dhe Drejtoria për Gjeodezi, Kadastër dhe Pronë.

- b). Shqyrtimi i Propozim-vendimit për caktimin zonës me interes publik të pronës së paluajtshme të komunës

Shpëtim Zhegrova, kryesues i kuvendit – bëri të ditur se kjo zonë për të cilën po diskutohet, ka të bëjë me një parcelë në fshatin Stanoc i Epërm tek varrezat e dëshmorëve. Kjo konsiderohet që të dedikohet si lokacion për varrezat e Veteranëve të UÇK-së dhe që brenda këtij vendimi të inkorporohet kërkesa e Shoqatës së Familjeve të Dëshmorëve, që një pjesë e kësaj prone të ndahet për lokacion të varrezave të prindërve të dëshmorëve.

Gëzim Zuqaku, kryetar i SHFD-së - paraqiti sqarime para anëtarëve të kuvendit, duke arsyetuar kërkesën e Shoqatës së Familjeve të Dëshmorëve si dhe arsyetoi se përse është e nevojshme që të merret një vendim i tillë.

Ali Januzi, anëtar i kuvendit – tha se lidhur me këtë çështje do të ishte më mirë që në këtë mbledhje të mos merret kurrfarë vendimi, për faktin se në disa raste tjera ishin marrë vendime për këso lloj çështjesh, por më vonë është dashur që ato vendime të anulohen. Pastaj ai vlerësoi se kjo çështje është mjaft e ndjeshme, për faktin se Dëshmorët e Kombit “nuk janë të familjeve”, por janë të të gjithëve, andaj lidhur me caktimin e këtij lokacioni duhet të bëhen analiza të mirëfillta dhe konform kësaj të merret një vendim i arsyeshëm dhe i drejtë.

Ilmi Azemi, anëtar i kuvendit – tha se në këtë mbledhje duhet të merret vendimi lidhur me këtë çështje, pasi në këtë rast kemi të bëjmë me caktimin e një lokacioni për varrezat e prindërve të dëshmorëve dhe kjo po bëhet afër varrezave të dëshmorëve dhe sigurisht se kjo është një gjë pozitive. Mandej ai ceku se kjo çështje ka kaluar në filtrat e shoqatës kompetente dhe se kjo si e tillë duhet të marrë një kaheje apo një epilog, duke u aprovuar vendimi për këtë kërkesë.

Ali Januzi, anëtar i kuvendit – tha se ekziston një frikë, që nëse këta prindër favorizohen, atëherë mos po irritohen shumë familje tjera që kanë dhënë dëshmorë në kohëra të ndryshme të historisë sonë, andaj për këtë kërkoi që të ketë studim të kësaj çështjeje dhe ujdj në aprovimin e saj. Në fund tha se të gjithë të rënëve për lirinë e Kosovës, duhet t’u jepet vendi i merituar, të cilët janë të shumë dhe që kanë punuar e vepruar në kohëra të ndryshme. Andaj për çështjen në fjalë tha se duhet të bëhen analizat e mirëfillta para se të merret një vendim i tillë.

e). Shqyrtimi i Draft-Rregullores për Mënyrën e Organizimit dhe Funkcionimin e bibliotekës "Naim Frashëri", si dhe nëndegëve të saj në territorin e Vushtrrisë

Lidhur me këtë pikë të rendit të ditës, Kuvendi pas votimit në mënyrë "unanime" aprovoi Rregulloren për Mënyrën e Organizimit dhe Funkcionimin e bibliotekës "Naim Frashëri", si dhe nëndegëve të saj në territorin e Vushtrrisë.

ç). Shqyrtimi i Propozim-vendimit për rithemelimin e arkivit komunal të Vushtrrisë

Lidhur me këtë pikë të rendit të ditës, Kuvendi pas votimit në mënyrë "unanime" vendosi me sa vijon:

1. Me këtë vendim rithemelohet Arkivi Komunal i Vushtrrisë.
2. Lokacioni i Arkivit Komunal gjendet në objektin e ish-TMK-së, në rrugën "Gjergj Kastrioti Skënderbeu" në Vushtrri, i cili do të transferohet në objektin e Qendrës së Kulturës "Hasan Prishtina" pas përfundimit të punimeve.
3. Me hyrjen në fuqi të këtij vendimi, shfuqizohet vendimi Nr.022-34 i datës 10.07.1980.
4. Për zbatimin e këtij vendimi obligohen: Drejtoria për Kulturë, Rini dhe Sport dhe udhëheqësi i arkivit komunal.

d). Shqyrtimi i Propozim-vendimit për ridestinimin e mjeteve financiare të komunës

Lidhur me këtë pikë të rendit të ditës, Kuvendi pas votimit në mënyrë "unanime" vendosi me sa vijon:

1. Me këtë vendim, bëhet ridestinimi i mjeteve të investimeve kapitale të shëndetësisë dhe mirëqenies sociale, në shumë të përgjithshme prej 6122 € si në vijim:

1.1 Projekti "Meremetimi i QMF-së në Lumadh" i vitit 2017 (programi 74450, kodi i projektit 45242) pas përfundimit të tij ka rezultuar në mbetjen e mjeteve në shumë prej 5280 euro.

1.2 Projekti "Pajisje mjekësore" i vitit 2017 (programi 74450, kodi i projektit 45253) pas realizimit të këtij projekti kanë mbetur 327 euro.

1.3 Projekti "Furnizim me inventar" i vitit 2017 (programi 74450, kodi i projektit 45261) pas realizimit të këtij projekti kanë mbetur 515 euro.

2. Shuma e mjeteve të cekura si në pikën 1 të këtij vendimi, ridestinohen në projektin e ri për vitin 2017 Pajisje (akses-kontroll për hyrje-dalje të punëtorëve të shëndetësisë).

3. Për zbatimin e këtij vendimi obligohen: Drejtoria për Buxhet dhe Financa dhe Drejtoria për Shëndetësi dhe Mirëqenie sociale.

dh). Shqyrtimi i Draft-Rregullores për Organizimin dhe Funkcionimin e Ansamblit Komunal të Këngëve dhe Valleve "Hasan Prishtina" në Vushtrri

Lidhur me këtë pikë të rendit të ditës, Kuvendi pas votimit në mënyrë "unanime" aprovoi Rregulloren për Organizimin dhe Funkcionimin e Ansamblit Komunal të Këngëve dhe Valleve "Hasan Prishtina" në Vushtrri.

e). Shqyrtimi i Draft-Rregullores për Organizimin dhe Funksonimin e Teatrit të Qytetit të Vushtrrisë

Lidhur me këtë pikë të rendit të ditës, Kuvendi pas votimit në mënyrë “unanime” aprovoi Rregulloren për Organizimin dhe Funksonimin e Teatrit të Qytetit të Vushtrrisë.

ë). Shqyrtimi i Draft-Rregullores për Mënyrën e Organizimit dhe Funksonimit të Muzeut Historik-Etnografik në Komunën e Vushtrrisë

Shukrane Begu, udhëheqëse e Muzeut - kërkoi që të bëhet ndryshimi tek neni 9 i kësaj rregulloreje, ku thuhet udhëheqësi i muzeut, të jetë drejtori i muzeut.

Lidhur me këtë pikë të rendit të ditës, Kuvendi pas votimit në mënyrë “unanime” aprovoi Rregulloren për Mënyrën e Organizimit dhe Funksonimit të Muzeut Historik-Etnografik në Komunën e Vushtrrisë.

ñ). Shqyrtimi i Draft-Rregullores për Organizimin dhe Funksonimin e Arkivit Komunal të Vushtrrisë

Lidhur me këtë pikë të rendit të ditës, Kuvendi pas votimit në mënyrë “unanime” aprovoi Rregulloren për Organizimin dhe Funksonimin e Arkivit Komunal të Vushtrrisë.

g). Pyetjet e anëtarëve të kuvendit:


Habib Mustafa, anëtar i kuvendit – kërkoi që të bëhet shtrimi i rrugës alternative tek ura e fshatit Gllavatin.

Shkelzen Feka, anëtar i kuvendit – pyeti se çka po ndodh me kanalizimin në fshatin Dalak dhe Shtitaricë, pasi që banorët e këtyre fshatrave kanë bërë një ankesë për dëmtim të rrjetit të kanalizimit, andaj pyeti sa a ka ndërmarrë komuna ndonjë veprim për sanimin e këtij problemi.


Bajram Mulaku, Kryetar i komunës – tha se vendimi i kuvendit për heqjen e kushtëzimit të qytetarëve për pagesën e taksës për mbeturina, për ofrimin e shërbimeve komunale do të zbatohet dhe këtë e ka kërkuar nga Drejtoria e Financave. Mandej lidhur me dërgimin e materialit të kuvendit në afat ligjor, ceku se është e vështirë që ky afat të respektohet në përpikëri pasi që pas këtij afati paraqiten çështje që janë me rëndësi të futen në rend të ditës. Lidhur me rrugën tek ura e fshatit Gllavatin ceku se ajo shumë shpejt do të rregullohet. Mandej lidhur me kanalizimin në fshatin Dalak dhe Shtitaricë ceku se është i njoftuar me këtë problem dhe shtoi se e gjithë infrastruktura e ujërave të zeza pasi të ndërtohet kalon në pronësi të ndërmarrjes publike dhe tani komuna nuk ka obligim të merret me mirëmbajtjen e kësaj infrastrukture.

Mbledhja përfundoi në orën 14:10.

Bastri Duraku


Procesmbajtës

Shpëtim Zhegrova


Kryesues i Kuvendit